



REPUBLIKA E SHQIPËRISË
KOMISIONERI PËR MBIKËQYRJEN E SHËRBIMIT CIVIL

Bulevardi "Zog I", Godina 57/2

Tel. 04 268142; Fax 04268141

Nr. 708 Prot.

Tiranë, më 24.11.2016

V E N D I M
Nr. 141, datë 24.11.2016

**Mbi përfundimin e procedimit administrativ,
filluar me urdhrin e verifikimit nr. 807/1, datë 23.11.2015**

Në mbështetje të kompetencave ligjore të parashikuara në nenin 11, pika 1, nenet 14 dhe 15 të ligjit nr. 152/2013, "Për nëpunësin civil", i ndryshuar, neneve 80-104 të ligjit nr. 8485, datë 12.05.1999, "Kodi i Procedurave Administrative të Republikës së Shqipërisë", si dhe Rregullores "Mbi procedurat e mbikëqyrjes/inspektimit", miratuar me vendimin nr. 17, datë 11.03.2015, të Komisionerit për Mbikëqyrjen e Shërbimit Civil, pas shqyrtimit të relacionit dhe mendimit të dhënë prej Drejtorisë së Mbikëqyrjes, në lidhje me procedurën e verifikimit të kryer në Institucionin e Bashkisë Tiranë, për rastin e nëpunësit *****.

VËREJ SE,

Shkak për fillimin e kësaj procedure është bërë një ankesë e paraqitur nga nëpunësi ***** , protokolluar pranë Komisionerit për Mbikëqyrjen e Shërbimit Civil, me nr. 807 prot., datë 16.11.2015, përmes së cilës pretendohet, se ndaj tij, në shkelje flagrante të ligjit, është vendosur lirimi nga shërbimi civil. Në kërkesë është parashtruar se nga ana e Bashkisë Tiranë, nuk janë respektuar kërkesat e ligjit 152/2013 "Për nëpunësin civil", i ndryshuar dhe të Vendimit të Këshillit të Ministrave nr. 171, datë 26.3.2014, "Për transferimin e përhershëm dhe të përkohshëm të nëpunësve civilë, pezullimin dhe lirin nga shërbimi civil", pasi nuk është zbatuar procedura, si dhe vendimi i marrë për lirin e tij nga shërbimi civil, ka qenë i pajustificuar sepse nuk ka pasur shkurtim të vendit të punës.

Pas shqyrtimit paraprakisht të kërkesës, lidhur me përmbushjen e kriterëve formale ligjore, është urdhëruar fillimi i hetimit administrativ për rastin në fjalë. Me qëllim përcaktimin e gjendjes së fakteve dhe rrethanave që kanë lidhje me çështjen, është njoftuar institucioni Bashkia Tiranë, për fillimin e hetimit administrativ, duke kërkuar prej tyre, të vënë në administrim të Komisionerit, të gjitha aktet administrative që materializojnë procesin e ristrukturimit të institucionit si dhe procedurat e ndjekura për lirin nga shërbimi civil të nëpunësit *****.

Në përgjigje të kërkesës, me shkresën nr.19174/1, datë 03.12.2015, me lëndë “*Kthim përgjigje*”, institucioni ka informuar Komisionerin se, Bashkia Tiranë, në kuadër të riorganizimit për shkak të reformës territoriale, është përfshirë në proces ristrukturimi dhe aktualisht ka përfunduar vetëm sistemimi i punonjësve që janë pjesë e aparatit qendror, ndërkohë që ende nuk ka përfunduar ristrukturimi për të gjithë institucionin, pasi procesi është duke vijuar me sistemimin e njësive administrative, që janë pjesë e Bashkisë Tiranë.

Nisur nga dokumentacioni që është vënë në dispozicion prej Bashkisë Tiranë si dhe nga sa u analizua më sipër, Komisioneri vlerësoi se ky institucion ndodhej në kushtet e ristrukturimit, i cili ka filluar me miratimin e strukturës së re të institucionit, sipas Urdhërit të Kryetarit të Bashkisë Tiranë, nr. 12620, datë 14.09.2015 “*Për miratimin e Strukturës dhe Organikës së Aparatit të Bashkisë Tiranë*” dhe ka vijuar me ngritjen e Komisionit të Ristrukturimit, sipas Urdhërit nr. 12889, datë 16.09.2015, të njësive përgjegjëse, përbërja e të cilit është në përputhje me nenin 50, të ligjit nr.152/2013 “*Për nëpunësin civil*”, i ndryshuar.

Në këto rrethana, duke analizuar kërkesën e institucionit, si dhe duke vlerësuar faktet si më poshtë:

- Në kushtet kur, procesi i ristrukturimit, nuk kishte përfunduar dhe ende ekzistonte mundësia e risistemimit të punonjësit të liruar, në pozicionet e mbetura pa u prekur nga procesi;
- duke marrë parasysh nivelin e lartë të vështirësisë së procesit, ***së pari***, për shkak të numrit të madh të pozicioneve të punës dhe punonjësve që preken nga ristrukturimi, rreth 800 pozicione, ***së dyti*** për shkak të dokumentacionit voluminoz që do të merret në shqyrtim nga Komisioni i Ristrukturimit, i cili do të vijojë të shtohet deri në përfundim të procesit nga Njësia Përgjegjëse, si dhe për faktin se;
- Institucioni ishte brenda afateve të përcaktuara nga ligji nr. 8652, datë 31.07.2000 “*Për organizimin dhe funksionimin e qeverisjes vendore*”, i ndryshuar dhe në Vendimin nr. 510, datë 10.06.2015, të Këshillit të Ministrave, “*Për miratimin e procedurave për transferimin e të drejtave dhe detyrimeve, personelit, aktiveve të trupëzuara dhe të patrupëzuara, të arkivave dhe çdo dokumentacioni tjetër zyrtar në njësitë e qeverisjes vendore, të prekura nga riorganizimi administrativo-teritorial*”, Kreu IV, për përfundimin e transferimit dhe pozicionimit në kohë të personelit;

Komisioneri, vlerësoi se në këtë rast, duhej t’i jepte kohën e nevojshme Komisionit të Ristrukturimit për të përfunduar riorganizimin e institucionit. Vetëm pas përfundimit të procesit nga strukturat kompetente, Komisioneri i krijohet mundësia për të verifikuar zbatimin e ligjshmërisë, gjatë zhvillimit të procedurave për implementimin e strukturës së re të Bashkisë Tiranë. Nisur nga sa më lart, me Vendimin nr. 129, datë 11.12.2015, Komisioneri, ka vendosur të pezullojë procesin e verifikimit të informacionit të ardhur nga ky nëpunës, deri në përfundim të procedurave të ristrukturimit të Bashkisë Tiranë. Në pikën 2 të këtij vendimi, është ngarkuar institucioni, të njoftojë me shkrim Komisionerin, për përfundimin prej tyre të procedurave të ristrukturimit, si dhe të dërgojë të gjitha aktet administrative që materializojnë procedurën e ristrukturimit, për të mundësuar vijimin e hetimit administrativ të rastit në fjalë.

Më pas, konstatohet se gjatë procesit të ristrukturimit, nga ana e Bashkisë Tiranë, është anuluar akti administrativ nr. 17813 prot., datë 12.11.2015, me të cilin është vendosur lirimi nga shërbimi

civil i nëpunësit ***** , pasi është vlerësuar prej tyre, se ai i plotësonte kërkesat e përgjithshme dhe të posaçme për të punuar në një pozicion tjetër pune, pjesë e shërbimit civil. Ky konstatim provohet me Urdhërin Nr. 17813/4, datë 17.11.2015, nëpërmjet të cilit është vendosur transferimi për shkak të ristrukturimit të institucionit, për nëpunësin ***** , nga pozicioni “*Specialist në Sektorin e Monitorimit të Cilësisë dhe Mjedisit*”, në Drejtorinë e Politikave dhe Edukimit Mjedisor, në Drejtorinë e Përgjithshme të Politikave të Zhvillimit dhe Promovimit të Qytetit, në pozicionin “*Specialist në Drejtorinë e Politikave dhe Edukimit Mjedisor*”, në Drejtorinë e Përgjithshme të Promovimit të Qytetit, në Bashkinë Tiranë, me kategori page III-b, akt i cili i është komunikuar Komisionerit me shumë vonesë.

Për këto arsye:

Në mbështetje të nenit 103 të ligjit nr. 8485, datë 12.5.1999, “*Kodi i Procedurave Administrative*”, i ndryshuar, si dhe nenit 34 të Rregullores “*Mbi procedurat e mbikëqyrjes/inspektimit*”, miratuar me Vendimin nr. 17, datë 11.03.2015, të Komisionerit për Mbikëqyrjen e Shërbimit Civil,

V E N D O S A :

1. Përfundimin e procedimit administrativ, të filluar me Urdhrin e Verifikimit nr. 807/1, datë 23.11.2015, “*Për verifikimin e aktit nr.17813 prot., datë 12.11.2015, të Njësisë Përgjegjëse të Bashkisë Tiranë*”, pasi ligjshmëria është rregulluar nga institucioni.
2. Të njoftohen për këtë vendim, Bashkia Tiranë dhe kërkuesi *****.
3. Ky vendim hyn në fuqi menjëherë.

KOMISIONERI

Pranvera STRAKOSHA